



إحنا على الأرض، ومفيش علاج لده، ولا وسيلة لرفع إيدنا في وسط الماتش عشان نخرج من الملعب ونبدّل مع حد تاني، مهما تعبنا وجبنا آخرنا واتصابنا واتوجعنا. لازم نفضل نجري ونجري ونجري لآخر دقيقة، ونبدل الي نقدر عليه عشان نحرز كل الأهداف الممكنة!

هل لازم تكون الرحلة صعبة؟

للأسف آه، وصعبة جدًا أحيانًا، ومؤلمة، لأن غرضها النهائي تنقيتنا من الشوائب، واستخلاص جوهرنا الحقيقي، زي الذهب الي ما بيتشكّلش غير بالنار، لكن.. حتى الأوقات الصعبة في وسطها لحظات راحة بنسكن فيها، ونعرف سرّ وجودنا، وتتبدّى لينا علامات ونُذّر للتصرفات الي لازم نعملها، والطرق الي لازم نمشي فيها، لو قريناها صح هنوقّر على نفسنا كثير، ولو عاندنا وتعالينا وما شفنهاش، أيامنا العسيرة هتزيد أكثر وأكثر.

وفي وسط الرحلة، الحب الصادق.. الحقيقي.. الرحيم، هو سِترَة النجاة الوحيدة من الغرق في خضم كل شيء: الدنيا والشهوة والظلم والجبروت والغرور والإدمان والبعد عن ربنا والخذلان والخوف، الدرقة

الوحيدة الي ممكن تصد عننا ضربات الحياة مهما كانت عفيّة،
عشان كده لازم يكون هو هدفنا الأهم من الرحلة، ولو وصلنا له،
نعضّ عليه بالنواجذ، لأنه اسم الله الأعظم الذي إذا نودي به أجاب.
الحب هو الله نفسه.

حسام

مدينة العبور، 10 من ديسمبر 2018

